

東
華
續
錄

東華續錄

咸豐十七

臣王先謙敬編

臣陶澐宣恭校

九月戊申朔諭軍機大臣等有人奏湖南軍務臚列八條朕詳加披閱如所稱將弁遷延稟報捏飾縱兵逃避捷勇潮勇肆行搶掠均係實在情形和春帶兵自入楚境以來但事尾追並未痛剿賊匪陝西及沅州協兵在長沙南門禦賊逃散一空統兵將官福誠尹培立等至今尙無下落似此毫無紀律老師糜餉何所底止著賽尙阿程喬采按照摺內所陳情形嚴查參辦並嚴飭帶兵鎮將合力兜剿迅將長沙城外賊匪全數撲滅其郴州永興一帶竄出賊夥趕緊分投截擊使賊首尾不能相顧毋得再任遷延貽誤致干重罪至所稱挑選精兵堅守衡郡分兵專剿零匪收船以淨水

面均著賽尙阿等悉心體察妥速辦理捷勇潮勇尤須駕馭得宜此輩本非善類既藉其剽悍殺賊仍當禁其擾害示以鈐制著徐廣綰與勞崇光密商或將捷勇自爲一軍酌派力能管束之大員督飭張國樑等分領或畱軍營或撤回廣西專剿本地土匪其技勇出衆人尙馴順者拔置營伍桀驁生事者隨時酌量安插遣散潮勇亦須妥爲控馭勿令與賊黨暗相勾結其所稱堅壁清野之法前經唐鑑具奏曾諭令廣西酌辦此事自是良法但須因地制宜未便強民以所難行惟在守土官吏相機勸導築堡立寨使民自爲守衛若必官爲給帑無論無此鉅款且恐有名無實轉滋擾累著各就該省地方情形妥爲籌辦務須實力奉行足資捍禦原摺著鈔給閱看將此由六百里各諭令知之○己酉諭內閣自廣西軍興以來將及兩載朕念生民塗炭宵旰焦勞無時或釋前因

大學士賽尙阿人尙樸誠能任艱苦特命爲欽差大臣前往督剿
又慮其秉性慈柔諄諄誥誥特賜邊必隆刀翼其隨時振厲以肅
軍威上年大軍圍賊於新墟紫荊山等處初猶屢次獲勝迨賊竄
踞永安葛爾一城圍攻半載有餘迄無成效轉致損將折兵任賊
鴟張圍撲桂林省城旋又竄掠興安攻陷全州繼復任賊竄入楚
境連陷數城見又分股圍長沙省城賽尙阿身爲統帥調度乖方
總由號令不嚴賞罰失當以致勞師糜餉日久無功實屬孤恩大
負委任賽尙阿著革職拏問由徐廣縉派員解交刑部治罪程喬
采總制兩湖特命前往湖南督辦防堵一年之久如果布置得宜
堵禦嚴密何至任賊竄越竟由道州郴州永興一帶直撲省城該
督初聞賊警遽返長沙已不免張皇失措繼復株守衡州一籌莫
展前已摘去翎頂不足蔽辜程喬采著卽行革職仍畱軍營辦理

糧臺事務賂秉章鮑起豹均有文武地方之責不能豫爲防範咎亦難辭惟念見在長沙城內守禦正當喫緊之時著俟剿辦省城賊匪完竣後再降諭旨前次賊竄永安朕卽察知賽尙阿攻剿不能得力特諭徐廣縉統兵前赴廣西會剿嗣因梧州艇匪業已剿除淨盡桂林賊匪竄入湖南仍命該督統兵赴楚督剿茲據奏稱接奉諭旨當卽起行並飭福興統帶兵勇數千名先期閒道前進計此時已抵湖南軍營徐廣縉平素辦事愼密有爲操縱合宜朕所深悉著卽授爲欽差大臣接受關防並署理湖廣總督所有軍營及地方文武統歸節制賽尙阿所帶文武各員著徐廣縉察看酌量分別去畱該大臣膺茲重任必能整飭紀律嚴明賞罰迅奏膚功以慰朕望所有廣東廣西江西湖北與湖南毗連地方均責成各該督撫提鎮等嚴密堵禦勿令竄越務期同心協力掃蕩妖

氛以綏疆圉○諭葉名琛奏廣西遣散壯勇句串游民於韶州一帶聚眾滋擾見在分派剿捕並將堵捕不力之文武各員分別參辦一摺廣東曲江匪徒不過數百人該地方文武如能立即捕獲何至任賊句串一千餘人擾及仁化樂昌乳源等縣並將樂昌監獄開放見經提督崑壽護南韶連鎮總兵通安等各帶兵勇四路合圍該署督葉名琛著遵前旨馳赴南韶一帶地方嚴飭帶兵各員奮力殲除毋任竄逸並將連平翁源廣甯各州縣股匪一律剿捕勿畱餘孽徐廣縉見已抵楚督辦軍務如楚粵交界有須越境夾擊之處並著葉名琛飭令將弁合力協剿毋誤事機南韶連鎮右營都司李殿熊署曲江縣知縣符鼎庸堵捕未能嚴密接仗又復失利符鼎庸又於驛遞本章延閣十餘日之久更屬疲玩李殿熊符鼎庸均著革職仁化縣知縣劉福蔭城守營把總郭有成署

樂昌縣知縣經文署城守營千總鍾煜雖於鄰匪紛竄入城旋即殺退究未能先事豫防非尋常疏忽可比著與樂昌縣典史婁禹甸一併革職以示懲儆○兩廣總督徐廣縉奏查福興帶兵剿辦鬱林土匪業已行抵濛江經臣調回梧州卽飭該總兵挑選兵勇共二千餘名派遊擊蘇崇阿隨同福興統帶以資調遣福興於八月初八日在梧州起程臣近接探報知逆匪大股仍踞郴州總兵和春見紫營獅子嶺圍剿此起援剿之兵已飭令取道賀縣江華由間道馳赴大營報聞又奏臣剿辦艇匪節據拏獲首匪西南長等供出前次投誠之張釗等在濛江充當撫勇仍與艇匪勾連並有接濟火藥等事隨卽密飭查拏見經拏獲訊據供稱伊在省城帶領壯勇因聞大兵攻剿艇匪潛回探聽卽送火藥一千餘斤接濟等情不諱查張釗卽大頭羊旣經投誠膽敢勾通賊匪潛謀接

濟實屬罪不容誅當將張釗及同獲之夥匪六名一併正法並曉諭各屬如果該匪等真知改悔予以自新儻仍有通盜等弊則罪在不赦斷難法外施仁得旨辦理甚好此等反側無常之徒誅之以作先聲俟卿到楚後軍營耳目自必一新如此曉諭亦甚是○左副都御史程庭桂乞解職回籍養親允之○庚戌諭內閣前據戶部奏請捐納軍功舉人生員一摺著不准行○辛亥諭內閣昨日閱看外火器營操演槍礮聲勢聯絡步伐亦極整齊由內發銀五千六百兩著賞該營兵丁以示獎勵○賽尙阿程喬采奏據報賊踞省城南門外民房八月初九日瞿騰龍等帶領楚苗各兵縋城出戰殺賊多名次日將附近賊營房屋並賊哨棚數十間盡行燒燬十一日南河港地方有賊船五十餘隻木簰數架在彼灣泊經長沙府縣密派壯勇潛往焚燒賊船二十餘隻奪獲木簰二

架餘賊遁逃仍踞南門外鼇山廟黃土嶺等處十三日鄧紹良王家琳瞿騰龍分兵出擊斃賊百餘名生擒一名副將朱瀚亦用礮擊毀僞西王所踞民房斃賊十餘人是日和春抵省將兵勇分紮各門當卽進城面與在城文武籌度據稟城內江西四川合本省官兵四千餘名足資守禦於各城周厯惟南門一面受敵城之西面本屬瀕江和春當將所帶楚黔各兵均於東門外紮營王家琳帶兵於西門外東西湖橋紮營開隆阿帶廣東等兵在北門外紮營和春之營距賊巢甚近其城外餉道及往來文報均可通行十五日分隊進攻該逆伏巢不出十六日於蔡公墳挖築營壘賊由妙高峯寺右突出百餘人經貴州兵勇擊退是日向榮舟達湘潭計日可以抵省其郴州之賊併由西路全竄十三日李瑞追及於豐樂橋頗有斬獲次日追及於永興城外見賊紛紛渡河奔入城

內據探郴州賊之大夥併歸永興並聞長沙賊被官兵擊敗有由郴州搬取大夥之信先是永興之賊分股千餘取道安仁前赴長沙常祿卽令張國樑分撥捷勇並楚兵千名往安仁大路攔剿一面設法攻城近城北面崇福菴地方有賊大營一座張國樑挑選精勇二千餘名令勇目張連升程智泉分爲兩隊於十四日繞路潛至東北兩門外設伏參將慶福帶領楚兵川勇由西門外沈沙港一路焚燒賊營常祿親率湖北官兵由靈龜橋新路下街大路進攻賊隊千餘衝出我軍詐退俟其追至伏兵槍礮齊發賊匪多被擊斃李連升帶捷勇五百爲前隊詐爲賊兵直奔崇福菴賊營該匪正在觀望李連升等已逼近賊營火罐噴筒齊發賊眾忙亂我兵乘勢擁入殺賊無數餘賊奔竄城中之賊欲出救應張國樑等乘勢搶入城門刀矛齊舉斃賊四五十名生擒十六名賊由東

門棄城而竄東門外豫伏潮勇又槍斃數十名生擒七名餘匪望
茶山拌死竄走西門外及沈沙港賊見城中火起亦棄城東奔由
浮橋過河兵勇追殺擠落淹斃者不少時已昏黑未能窮追賊俱
東走安仁將與永興賊合往長沙常祿督帶兵勇望安仁縣進發
行近安民司一帶隔河見有賊眾千餘卽分隊前進甫抵河邊賊
舉旗迎撲我軍涉淺直衝賊陣賊不能敵紛紛亂竄兵勇乘勝追
殺數里暫於河干紮營據獲賊供稱僞太平王洪秀泉僞東王楊
秀清兩賊首已在前隊此係中隊後隊聞中隊爲官軍擊敗想必
退回等語臣等見飭常祿等仍前追剿設法攔截並飭李瑞等軍
趕緊前追合力剿洗一面飭令和春等慎防賊之大夥踵至並將
總兵清保所帶江西兵一千名調回該省在交界處所擇要籌防
以期兼顧東越江西一路羅繞典向榮鮑起豹駱秉章奏和春等

連日督兵轟擊城外踞匪該匪堅壁不出

臣

向榮與

臣

繞典等密

商於二十日分三路進攻中路由白沙井直攻賊營左路由仰天湖進攻妙高峯之賊右路由蔡公墳沿城至南門大街進攻賊巢河北鎮王家琳督帶官兵在於西面攻擊俱於寅刻齊到賊營中路官弁兵勇撲至牆邊爭先搶上該匪於牆邊編插竹籤我軍隨進隨拔將賊營外牆拆毀數十丈一擁而入連開槍礮斃賊多名時參將鄭魁士正欲搶上內牆該匪於牆內連放槍礮該參將額顱突被槍傷血流滿面猶復揮兵冒煙攻擊奈牆堅終難攻入左路秦定三江忠源帶領兵勇出隊見妙高峯賊巢突出賊匪五六百人卽經我軍一齊壓下賊眾紛紛敗退右路官弁兵勇由蔡公墳直下先拋火罐燒燬房屋並撲至牆邊將其外牆木板拆毀乘勢拔去編地竹籤計三路攻巢斃賊四百餘人兵勇受傷一百四

十餘名陣亡十三名二十二日查探郴州大股賊匪由醴陵路緣山來省臣等當派秦定三等各帶兵勇迎頭攻剿逆匪三四千人分撲貴州湖南兵營盤並分千餘人由東路欲包我軍之後經兵勇奮力迎擊槍礮齊施繼以刀矛賊始敗退入巢官兵亦卽撤隊計斃賊一百餘名貴州郎洞營參將任大貴頭被礮傷登時陣亡副將德安骸受石傷知府江忠源被賊矛傷右骸落馬經楚勇救護得生並立時將此賊砍斃此外兵勇亦有傷亡見在飛飭帶兵員弁迅速趨程前進另籌防剿並疊咨湖北江西各省嚴密堵截以免竄逸上諭軍機大臣等據賽尙阿等奏連日戰守獲勝各情又據羅繞典等奏會商進剿獲勝並郴州大股賊匪踵至各摺片逆匪大股竄出郴州經我兵中途堵截屢有斬擒其圍撲省城之賊亦經我兵屢次攻剿殲斃不少惟賊勢尙熾總未大受懲創

且郴州大股賊匪全往省城勢必拚死抗拒省垣重地豈容稍有疏虞昨已降旨授徐廣縉爲欽差大臣並署湖廣總督此時計已馳抵軍營著卽相度地勢扼要駐紮督飭福興所帶得勝兵勇並各路援兵迅赴長沙接應截賊分竄之路痛加剿洗與羅繞典鮑起豹駱秉章等同心協力殄此羣兇至賊匪豕突狼奔行蹤靡定所有湖北防堵事宜並著徐廣縉悉心籌畫以杜北竄見在岳州荊州等處督辦防剿之博勒恭武台湧能否得力著卽確查一面奏聞一面酌量調度毋誤事機江西接壤之處亦須隨時知照合力兜剿其已革提督余萬清已革總兵劉長清前令賽尙阿嚴審定擬至今尙未奏到並失守各城文武員弁均著徐廣縉迅卽查明審擬具奏又本日御史周有誼奏請申明軍令並片奏解散脅從等語見在賽尙阿已罹重罪其所派統兵各員如有臨陣退縮

趨避取巧者著卽查明嚴行參辦以肅戎行至賊匪裹脅之眾不
乏良民卽逼迫入會者亦未必甘心從逆應如何解散其黨或出
示曉諭使賊眾日散賊勢日孤諒該大臣必能操縱得宜也周有
簠摺片鈔給閱看將此由六百里諭知徐廣縉羅繞典張亮基鮑
起豹駱秉章並傳諭程裔采向榮知之○命訥爾經額爲大學士
仍留直隸總督任○以戶部尙書禧恩吏部尙書賈楨俱協辦大
學士○以克復永興免總兵官常祿處分子參將德亮議敘擢張
國棟以都司升用○予湖南陣亡參將任大貴祭葬世職○命兩
江總督陸建瀛河道總督楊以增勘辦洪澤湖仁壩工程○甲寅
諭內閣陸建瀛楊以增奏請畱調任臬司幫辦大工等語調任甘
肅按察使查文經上年幫辦豐北大工未能堵合昨降旨交部議
處茲據該督等奏稱該臬司熟悉工程任勞任怨著准其仍畱南

河幫辦堵築事宜工竣再行來京陛見○諭舒興阿奏官兵堵剿番賊大獲勝仗全股殲除並生擒首惡見在撤兵歸伍一摺甘肅涼州鎮羌卡外番賊竄擾松山一帶糾合族番二千三百餘人分股搶掠沿邊牲畜四萬有奇潛匿麻黃溝內經官兵疊次追剿提督索文督同總兵雙銳副將雙來並派副將蕭鳴章參將樂善等各帶弁兵分路堵截合力剿捕先將大股番賊六百餘人悉數殲除又將分竄之賊殲斃百數十人其首惡阿里克公住復經蕭鳴章督兵用礮轟傷卽時生擒餘匪逃竄者僅百餘人此股番賊糾結數千人盤踞河北柯柯烏蘇地方四出搶掠從未大受懲創此次官兵冒雪衝鋒兩日之間四戰四捷生擒賊首梟示並將盈千番賊殲剿殆盡復疊次緝獲漢奸多名分別根究懲治該督等督辦有方洵堪嘉尚舒興阿索文均著交部議敘所有鎮將備弁及

兵練人等著擇其尤爲出力者酌量保奏候朕施恩其節次陣亡弁兵一併查明請卹惟番賊出沒靡常各屬仍多零星搶劫之案並賊目才旦朵爾吉等所帶野番尙多逃匿不得因此股番賊剿除殆盡稍涉大意致有疏虞仍著該督嚴飭該提鎮等於沿邊一帶要隘處所隨時嚴密按捕勿畱餘孽以肅邊境而靖閭閻○命前任湖南巡撫駱秉章暫畱湖南辦理防剿事宜○乙卯諭內閣穆騰額奏哲孟雄部長懇赴前藏瞻禮一摺哲孟雄部長向來赴藏瞻禮例有定限見在尙未屆期念其稟請懇切加恩准赴前藏虔誠瞻禮事畢飭卽回牧無任滋事妄求○丙辰諭內閣孝和睿皇后永遠奉安昌西陵據欽天監奏謹擇於咸豐三年二月二十六日所有應行典禮及一切事宜著各該衙門屆期敬謹豫備○命五城於冬春二季設廠煮賑○丁巳賽尙阿程喬采奏據

報李瑞等於十七八等日追賊至安仁之白泥塘馬亦帶川兵趕到賊聞大隊踵至直竄茶陵二十一日我軍追至茶陵州城賊已於夜間分竄攸縣醴陵李瑞王錦繡經文岱帶兵與常祿分路前追黃昏時李瑞等兵追及於茶陵之大台市路嶺地方斃賊數十人我兵陣亡一名是日常祿兵勇趕至攸縣生擒長髮賊目數名馬龍之兵於辰刻馳至攸縣河邊探聞賊由對河上流東口渡蘓擁而來當派副將虎嵩林等分兵數百前往下流渡河由縣北繞出東南五里亭鈔過賊前埋伏馬龍同副將明安泰等帶兵渡河擊之該逆槍礮齊施我兵撲入賊隊短兵相接賊由縣東順河一帶奔竄馬龍督兵追殺至五里亭虎嵩林等伏兵突起殲賊數十常祿探知賊之大隊改道從攸縣小路直竄醴陵卽緊追至新市地方屯紮二十四日經文岱兵勇先抵醴陵之丹陵橋探得隔

嶺田溝有賊二千餘從東南路斜鈔而來知賊於攸縣分道誘我追兵直從大路跟剿意欲從後鈔襲參將德亮將隊伍潛伏松林俟賊頭隊已過突出邀擊經文岱等督率兵勇直衝賊陣該逆退踞路旁譚家大村相持時許忽分兩股從山溝鈔來適王錦繡李瑞常祿各兵勇齊到亦分左右從高壓下德亮麾令張國樑捷勇施放噴筒火罐焚燒民房煙燄蔽天各路兵勇併力攻擊槍礮齊施刀矛並舉斬殺及淹斃者不計其數餘匪紛紛潰逃又據向榮和春等稟一十日我軍分山白沙井仰天湖蔡公墳爲中左右三路進攻妙高峯及南門外賊營疊獲勝仗參將鄭魁士於攻破白沙井賊營外牆時正欲搶上內牆頭額被賊槍傷牆堅未能破入妙高峯之賊秦定三等分投迎擊多有斬獲二十三日向榮將城內五千斤大礮移至南門天星閣另築礮臺直對賊營轟擊該逆

巢穴房屋牆垣多被擊倒二十四日該逆突出四五千由黔兵營盤之東三路來撲我軍連開槍礮賊見我軍嚴整復分股欲鈔貴勇營盤秦定三督兵夾擊該逆立時敗退入巢是日計斃賊二百餘人千總李九成奮勇殺賊被賊槍傷登時陣亡其餘兵勇亦有傷亡臣賽尙阿見於九月初一日由衡州統領親兵赴省臣程裔采因新田一帶土匪未淨暫駐衡州督辦並堵該逆回竄之路仍隨時確探賊情或移營岳州斷不敢株守貽誤湖南儘先參將鄭魁士疊次打仗立功今帶兵攻撲賊營頭額重傷猶復揮兵力戰實將領中不可多得之員相應請旨將鄭魁士免補參將以副將儘先補用先換頂帶並賞給勇號以示優獎此次賊自郴州竄出總兵李瑞截剿未能得力實屬咎有應得請旨交部議處貴州郎洞營參將任大貴湖南千總李九成殺賊捐軀深堪憫惻請旨

交部從優議卹

上諭內閣郴州夥匪由茶陵醴陵一帶欲竄省

垣經鎮將等分路追擊連日獲勝迨該逆退踞譚家村復經常祿李瑞德亮等督率張國樑併力痛加剿洗後路之賊剿殺殆盡其前路賊匪仍竄至省城復經和春向榮等屢次攻擊等語見在徐廣縉計已統帶精兵馳抵大營各路援兵雲集提督福興所帶兵勇數千名亦可由郴州一路趕到著徐廣縉等乘此攻剿得手之時合力殲擒務期迅解省圍殄滅羣醜無任餘匪竄逸總兵李瑞沿途追剿雖疊有斬擒惟於郴州夥匪分竄未能攔擊咎實難辭著交部議處湖南千總李九成奮勇捐軀著交部從優議卹○以屢著戰功予參將鄭魁士以副將升用並賞勇號○戊午 上啟鑒謁 東陵○論軍機大臣等據奕山德齡特克星額桂齡等奏夷匪四次竄入喀什噶爾所屬卡倫復經官兵擊退各一摺該匪

等竄擾卡倫已至四次其中必有巨匪爲之主謀是否卽係倭里罕等率領安集延及卡外回眾滋事抑或另有從中勾串主使之入據拏獲安集延布魯特奸匪供稱勾結潛辦鉛子火藥又探聽官兵數目是該匪等蓄謀煽亂已久見在卡內回子雖未被其煽惑而賊匪總未大受懲創仍在卡外窺伺難保不去而復來桂齡見在移營托古薩克務與特克星額確偵嚴防毋稍疏忽並著奕山布彥泰德齡嚴飭所屬並附近各城一體嚴密防堵不得以疊獲勝仗稍涉大意總以安撫回眾絕其勾結爲要將此各諭令知之○予湖南陣亡總兵官福誠副將尹培立等祭葬世職○免經過地方本年額賦十分之三○張亮基奏臣等訊據擒賊供稱偽西王於二十二日出探地勢被我兵礮擊左肩傷重未愈韋政已在郴州病故又據湘潭縣稟獲偽中王劉得中一名見已解衡審

辦至北門外前派瀏陽鄉勇三百名保護今又添派防兵千五百餘名以通文報而顧餉道報聞○已未賽尙阿程喬采奏臣等遵訊余萬清等棄城各情咸豐二年三月內逆匪竄及全州臣賽尙阿飭余萬清回南防堵該革員帶兵二百名回南因道州緊要前往防守於四月二十一日夜行抵州城時該州防兵及札調千總唐得升兵統計三百餘名二十五日逆匪竄至距城四十餘里之州冲莊水塘一帶該革員以匪數眾多與王揆一等酌商欲於距城十里之蛇皮渡河岸堵截王揆一未允該革員自帶兵二百名由西門走出當被賊匪衝散王揆一等正欲閉門賊已闖入王揆一被賊打傷當卽由城跳出欲趕回余萬清適賊眾大至失陷城池忿極投河經紳民陳立紀等撈救又欲用刀自刎亦爲眾搶護瞿我謙在城禦賊因見兵丁被害亦撲城外經兵救免千總唐得

升本駐防州境之蔣家嶺經余萬清調回二十五日午後甫經進城賊卽猝至該千總率眾迎敵因眾寡不敵骸臂均受矛傷復被賊打跌城溝經人扶救所有該革員身受各傷均曾委員驗明並非裝捏此案已革提督余萬清以提督大員帶兵分守道州因聞賊匪竄近防兵單薄欲赴城外之蛇皮渡堵禦既經該署州王揆一等阻止仍復帶兵出城以致州城失守余萬清合依守邊將帥被賊攻圍城寨不行固守而輒棄去失陷城寨者斬監候律擬斬監候已革遊擊瞿我謙所稱禦賊撲城並無確據顯係捏飾瞿我謙亦應照守邊將帥不行固守失陷城寨者斬監候律擬斬監候已革署道州知州王揆一雖於失城後未能死節但所稱投河自刎各情已據各紳民供認甚確且署篆數年頗有循聲民情愛戴王揆一應請發往軍臺效力贖罪千總唐得升甫經進城賊卽猝

至尙與未能固守者不同並曾斃賊多名身受三傷但堵禦究屬不力應請革職免其治罪又奏遵審劉長清等永明失守一案咸豐二年四月匪踞道州六月初八日分股撲陷江華永明縣知縣常連因與兩處毗連急須添兵堵禦時劉長清駐紮道州西路三十里橋十二日親往告急未允常連旋面稟和春當飭劉長清督帶兵勇趕往江華勦辦詎劉長清於十四日行抵永明之上江墟地方該匪已於十三日將永明城池攻陷守備錢志祖迎擊身受重傷經各兵扶救出城常連適亦趕到被賊圍住身受刃傷奮力衝出劉長清因恐上江墟三面受敵有誤事機未敢輕進時常連受傷折回催請進兵劉長清以賊蹤未定稱須相機而行常連旋因傷痛卧於民房劉長清探得路途多已被賊芟斷又以廣西富川縣恐被賊擾稟請攔截卽帶兵繞赴南路進發尙非藉詞逃避

此案已革四川北鎮總兵劉長清帶兵前往永明雖於未到縣城時城已被陷救援不及亦應乘勢進攻立圖克復迺以上江墟三面受敵爲詞繞赴鄰境紮營與臨陣先退無異劉長清合依官軍臨陣先退者斬監候律擬斬監候已革永明縣知縣常連因賊陷江華本境兵單輒自赴大營告急雖非畏縮引避究屬擅離職守擬從重發往新疆效力贖罪守備錢志祖防禦不力應卽革職

上諭內閣賽尙阿等奏遵旨審明已革提鎮並文武員弁定擬罪名各一摺著刑部覆議具奏已革提督余萬清已革總兵劉長清均著徐廣縉派員解交刑部聽候諭旨○諭軍機大臣等常大瀉奏賊欲北竄湖北防禦兵單請於湖南速派官兵來岳助防並懇添調官兵一摺湖北與湖南緊連水陸處處可通見在長沙大兵雲集該匪被勒急迫難保不分股北竄所調陝甘各兵到楚尙

需時日仍恐緩不濟急該撫奏稱盤獲奸細據供逆匪欲分三股來攻湖北一由澧州一由巴陵一由平江各於陸路行走何以又供稱火藥槍礮擬用船載由水路前進與羅繞典咨稱該匪分兩次坐船五十餘隻欲竄下游等語亦不符合究竟賊蹤見在如何情形湖北水陸要隘處所如何設法布置嚴密堵禦之處該撫均未詳悉籌及朕心實深繫念且岳州一路實北省屏障又關繫湖南運餉要道設有疏虞所關非細著徐廣縉與羅繞典張亮基等會商於長沙大營速撥精兵數千名前赴岳州交博勒恭武添派扼要嚴防如賊眾北竄所有水陸兩路必應派兵繞出賊前設伏截擊斷不可但事尾追致賊竄逸又蹈桂林前轍其湖北衝要各處著台湧常大瀄博勒恭武雙福等相機調度扼要嚴防仍宜示以鎮靜毋得稍露張皇轉致居民驚擾常大瀄所請餉銀三十萬

兩已飭部速議具奏矣將此由六百里各諭令知之○調陝甘官兵三千名赴湖北剿賊○辛酉 上謁 昭西陵 孝陵 孝東

陵 景陵 裕陵謁 端慧皇太子園寢○諭軍機大臣等楊文

定奏遵旨籌議浙江漕運等語本年浙江漕行遲滯前經降旨令陸建瀛體察情形酌定辦理毋再異議其江南山東賑米業經陸建瀛奏截畱湖南及江西最後各幫亦經降旨飭令轉行遵辦見屆九月放賑之期截畱米石自應如該督前奏斷無再行議改之理惟浙船在前八幫截至八月下旬僅止陸續出江在後各幫尙有在浙未入蘇境者海運既經費無出糶變又折耗堪虞若徒空言催趙儻始終不能渡黃北上究應如何辦法著陸建瀛仍遵前旨酌量妥籌變通辦理卽由該督議定一面迅速奏聞一面知照漕運河道總督江蘇浙江巡撫一體照辦若再彼此推諉致令天

庾正供阻滯河干朕惟陸建瀛等是問恐不能當此重咎也原片鈔給閱看將此諭令知之○賞看守各行宮弁兵半月錢糧○壬戌上幸成子峪平安峪閱視山勢○羅繞典駱秉章張亮基向榮鮑起豹秦初二日賊六七千人突由妙高峯繞至瀏陽門外校場分三路進撲各營當派楚南官兵並縣丞嚴正圻同知賈亨晉知府江忠源各帶兵勇迎擊秦定三帶隊從中攻截臣向榮選派城內精兵二百餘名待衛開隆阿帶領川兵總城協勦該匪正在分撲營牆和春馳至上前橫截立斃賊匪多名復三面夾擊該匪紛紛倒地兵勇乘勢從賊屍躍過刀矛相接該匪死傷枕藉見勢不敵卽由校場東首敗去正在緊追賊忽總聚一處回頭猛攻我軍奮力開放槍礮繼以刀矛又斃數十人賊乃奔竄是日斃賊四五百名生擒十五名臣等惟有相機會剿悉數殲滅斷不任稍畱

餘孽 上諭內閣該逆自圍省城以來經此次大加懲創賊膽已落恐復乘閒逃竄著羅繞典張亮基等乘此攻剿得手之時激勵將弁合力殲擒徐廣縉計日已到大營著卽督飭在事文武各員迅速進攻痛加勦洗至湖北江西交界各處並著該將軍巡撫提鎮等一體嚴防毋任餘匪分竄總期掃蕩妖氛勿畱餘孽以靖疆圉○諭軍機大臣等羅繞典等奏兵勇大獲勝仗一摺自逆匪圍撲省城經我兵屢挫其鋒迫賊大股來省又經兵勇分隊迎擊大獲勝仗斃賊四五百名賊已大受懲創其上游各鎮將管帶重兵將次到省福興所帶得勝之兵計亦趕到正可趁此大兵雲集賊勢挫折之際合力夾擊一鼓蕩平見在賽尙阿業已革職拏問大營亟須統帥况當剿賊喫緊之時軍情變幻閒不容髮該大臣務當不分水陸兼程前進迅抵大營庶文武員弁得有統屬調度號

令壁壘一新刻下賊勢既挫難保不分投奔竄岳州湘陰等處爲賊北竄要路前已諭令徐廣縉選派大員帶兵數千迅赴岳州協防著仍遵前旨趕緊派員前往其湘陰一帶尤關緊要應如何豫籌堵截遏賊北竄之路著卽妥密布置毋失事機並隨時飛咨湖北江西一體嚴防總期四面兜圍俾賊進退失據自不難剋期殄滅張亮基所奏籌辦各路堵擊情形布置尙屬妥善第恐賊到兵散仍屬無補總宜揀派得力將弁督帶兵勇擇要嚴防以期人人用命方能有濟師克在和不在眾該大臣等諒能同心協力迅奏膚功也將此由六百里諭知徐廣縉羅繞典張亮基鮑起豹駱秉章並傳諭和春向榮知之○吏部以大學士訥爾經額應定何殿閣請得旨著爲文淵閣大學士○癸亥 上幸輔君山平安峪閱視山勢○甲子 上幸朱華山酌酒回鑾○賽尙阿奏臣於初一

日馳抵湘潭據報賊已由省城上游渡江於龍回潭等處村莊滋擾該處路通寶慶常德距湘潭縣城僅五六十里又接向榮報賊於初五日乘夜分二三千人潛由南湖港過河從龍回潭行走未知竄往何處其大隊仍踞城南臣惟有密探賊蹤前行攔截如直竄湘潭亦卽迎前堵剿計臣所帶親兵二千餘名又潮勇三千係知府朱啟仁帶在郴州打仗強猾不堪復用帶至衡州請爲遣散者嗣因衡州糧銀不敷給發恐其在衡滋事飭令帶赴省城領餉臣到湘潭後查知該勇等行走距縣未遠卽傳令該知府將該勇等無論行抵何處卽行登岸前探賊蹤與向榮等派出追兵前後合擊上諭軍機大臣等該逆於九月初二日在長沙校場冒經官兵大加懲創見復分股另竄顯係因省城大兵齊集希圖分我兵勢所有長沙見到官兵仍當併力直擣賊巢四面堵截不可再

任分竄又成尾追之勢其由龍回潭竄出賊蹤見在滋擾何處亟宜派兵迅速追剿賽尙阿所帶之兵亦可迎頭截擊惟所稱潮勇三千名既係強猾不堪復用何以又令與向榮等追兵合擊逃竄之賊恐駕馭失宜轉爲賊用不可不防省城大股賊匪前據羅繞典等奏敗回賊巢是否賊首及夥眾均在妙高峯一帶盤踞抑或另有巢穴在附近村莊如廣西莫村水竇情形著徐廣縉與羅繞典張亮基鮑起豹駱秉章等分飭在事文武各員相機度地或合力圍攻或出奇兵截斷賊勢杜其接濟路徑痛加剿洗賊撲省城已一月有餘我軍兵力不爲不厚徐廣縉及福興所帶兵勇均可到齊埽蕩賊氛正在此時切勿稍有遲延致失事機將此由六百里各諭令知之○乙丑諭軍機大臣等朕於本月十五十六日親至平安峪閱看陸應穀所立標記在上奕湘另立標記在其南十

五丈平坦之處堪輿甘熙等六員又稱穴在中間北距陸應穀標記九丈餘南距奕湘標記五丈餘朕親加詰問令與奕湘所帶堪輿鄭錫申等各抒所見呈遞說帖各執一詞著陸應穀平心體察眞龍眞穴究在何處務期考覈精詳勿涉游移兩可之見裕誠等摺片並甘熙等說帖俱著鈔給閱看將此諭令知之○丙寅賽尙阿奏據探賊分股由省城渡江至龍回潭等處又渡見家河而南屯踞陽湖等村與平塘相距數里平塘爲湘潭進省必由之路臣飛飭知府朱啟仁將所帶潮勇先赴平塘紮定一面督兵前往堵剿初八日黎明突有賊船數隻泊近西岸約數百人登岸撲營朱啟仁帶兵奮擊斃賊多名該匪旋即回船我勇追殺開礮斃賊數名賊船撐出江心西岸樹林起伏賊千餘我勇迎擊見家河又有賊約二千餘前來接應其江心賊船復回攏西岸適

臣帶兵及

水勇礮船趕到開礮擊碎賊船三隻追至豹子山腳並將東岸賊立望樓一座擊倒見家河及陽湖賊眾見我官軍大隊又到俱卽奔回並據向榮稟稱派馬龍帶兵渡河約次日與潮勇等夾擊初九日黎明遊擊韓世禧鮑雲翥蕭逢春秦如虎都司許連城等各帶兵勇分爲兩隊直攻賊巢仍令礮船由水路助攻陽湖村賊立卽潰逃我軍乘勢進攻旋將賊踞陽湖一帶村房盡行燒燬賊由小艇渡過見家河北礮船趕至轟毀賊船二隻賊匿河北營壘不出兵勇見水擊賊者受傷數名陣亡一名臣卽日從嶽麓山後取道前進令朱啟仁潮勇卽於見家河南岸紮定以防賊再渡河南寶臣於初九日抵省與羅繞典等籌定戰守再行具奏上諭軍機大臣等逆匪分股由省城渡江西岸至龍岡潭等處又由該處渡見家河而南屯踞陽湖等村雖經寶尙阿督率兵勇連擊獲勝

將賊扼回北岸並將其南岸陽湖等村賊巢盡行燒毀惟見家河
路通省城江面該逆已有船隻數十礮船五六隻隨時可以偷渡
見止有潮勇一軍專堵見家河南岸之路仍恐未能得力而北路
一帶尤關緊要必須將西岸之賊痛加剿洗其城南大夥尤應併
力攻擊萬勿遷延致令紛竄前曾諭令徐廣緒抵楚後扼要駐紮
見在賊眾全在長沙城外情形萬分喫緊何以至今尚未見該大
臣奏報抵楚日期且賽尙阿業經獲罪統帥無人賊心甚爲懸繫
著徐廣緒迅速兼程前進直赴省城與羅繞典張亮基駱秉章鮑
起豹等督率文武乘此賊夥聚集尙未潰散之時合力攻剿一鼓
殲除毋再遲延致誤事機將此由六百里各諭令知之○丁卯

上還圓明園○己巳賽尙阿羅繞典張亮基鮑起豹駱秉章奏連
日賊船偷渡河西擄掠米穀躡探路徑似有急竄之意臣賽尙阿

由湘潭南路疊剿將陽湖賊巢屯聚米穀盡行燒燬常祿等兵由朱田鋪進至洞井鋪地方偏賊而軍初三日向榮令開隆阿鄧紹良各帶兵縋城出剿秦定三帶兵由城外營盤迎至阿彌嶺遇賊四五千入由南路來當經我軍擊退斃賊七八十人初四日和春約常祿等移近駐紮正在拔營賊五六千人分股來撲李瑞營盤槍礮如雨常祿分兵接應直衝賊隊賊始敗走乘勝追殺數里斃賊無數初五日移營至石馬鋪初六日探賊已分股於我軍紮營上游數里渡河和春等疊攻南門外賊巢賊堅匿不出初八日我軍進至金盤嶺該逆繞出東面踞住嶺頭勢欲從高壓下我兵奮攻賊陣移動乘勢趕殺頗有斬獲總兵常存帶兵勇二千名駐紮對河以防賊西竄甯鄉北竄湘陰益陽之路經首府縣各派壯勇潛往河面燒去賊船十餘隻賊見河西既有準備又於上之見

家河乘夜分股偷渡築營向榮飛調馬龍兵會賽尙阿所帶之潮
勇等合剿將河西賊踞房屋及屯聚米穀盡行燒燬南門外踞賊
經向榮將東南鼇山廟等處房屋打壞楊秀青遣賊黨晝夜挖掘
地道俱經兵勇殺斃見令兵勇就城外挖成橫溝一道惟正南及
西南面賊踞房屋尙多完固妙高峯一帶地勢較高賊立土城望
樓拒守甚堅臣等籌議合圍攻擣以西河一路已有分股渡河之
賊必須先爲翦除臣賽尙阿飭向榮統領新到屯兵及鄧紹良馬
龍常存兵卽日渡河與見在平塘湖勇三千名合剿河西之賊和
春秦定三等兵合力攻打南門外賊巢十二日至漁網洲地方賊
從見家河出二千餘人經我兵槍斃數十遊擊曾正川首先搶入
賊隊短兵奮戰手刃悍賊數人身受多傷登時陣亡我兵正在喫
緊之際向榮飛騎趕到親率屯兵二三百人接應奮勇衝殺賊匪

紛紛倒地卽時敗走兵勇追殺直過兩重山梁餘賊竄歸舊巢和春秦定三帶領兵勇攻南門外賊巢賊三四十人出敵我軍用槍礮擊斃十餘人賊幾次來撲均被擊走忽南面出賊一二十人遙擁而來適開隆阿帶兵接應張國樑等兵亦由南踵至我軍聲勢聯絡斃賊無數賊奔回巢見在和春秦定三紮營妙高峯下緊逼賊巢必俟向榮將河西分股之賊先爲剿洗該逆勢孤較易得手

上諭內閣見在省城兵力厚集和春秦定三紮營妙高峯下與賊營緊逼逆首楊秀青屢謀開掘地道俱被我軍破其詭謀賊勢漸蹙極欲覓地遁逃南面常祿等營分布梭巡聲勢極爲聯絡徐廣綰卽日亦可統帶精兵馳抵長沙務須乘此攻剿得手之際嚴飭向榮一軍將竄赴西岸之賊先行剿洗其城南賊巢東西南三面圍定並著激勵兵勇各路會合併力殲除毋任潰圍竄出復滋

擾害陣亡貴州護遊擊曾正川著交部照例議卹○諭軍機大臣等戶部奏安徽募勇畱餉請飭覈實辦理一摺自粵西軍興以來國用支絀見在逆賊滋擾湖南安徽尙非鄰省該撫思患豫防固不得不密籌儲備惟請將全省下忙地丁關稅契雜監銀一併存畱作爲防堵之用計約銀一百三十餘萬兩之多殊屬不知緩急前經戶部指撥該省南河歲料銀及湖南軍餉各銀均未據該撫奏明撥解輒請將該省正雜各款全行扣畱儻撥解之項稍有貽誤咎將誰執至募勇一節廣西湖南軍營多有不能得力者此輩性成慆悍臨時既虞其滋擾事後復難於遣散加以添備器械製造船隻隨在皆需經費該撫並未全盤籌及僅以報銷一語了此鉅款豈不知近來撥款甚艱若他省均如此瀆請將何以應之耶該省額設營兵雖經徵調存營之兵正宜及時操練悉成勁旅以

期有備無患並當實力編查保甲密拏奸細持以鎮靜俾人不
至驚擾卽須募勇集團互相保衛以濟兵力之不足亦宜與地方
公正紳耆籌商勸諭捐貲出力均可奏請獎勵庶不至虛糜餉需
有名無實著陸建瀛蔣文慶體察該省情形慎密防守不可徒事
張皇轉滋流弊所請截畱各款必須認真撙節應如何覈實支銷
所募壯勇如何約束管帶卽行詳悉奏明辦理戶部前撥河南湖
南銀兩亦著迅卽委員起解毋再遲延將此各諭令知之○諭穆
騰額奏乍丫小喇嘛起釁滋事派員馳往查辦一摺乍丫小喇嘛
因挾夙嫌膽敢糾集多人將諾們罕屬下大小頭人殺斃十七名
敕書卽信寺院財物俱被焚搶差人勸解執拗不從並搶劫塘兵
馬匹見將諾們罕拘禁復敢私擬斷牌擅蓋印信勒令遵依似此
狂悖實屬目無法紀見在該大臣派委噶布倫策墊前往查辦並

派察木多倉儲巴乍了守備朱長春一同前往著卽飭令各該員等秉公曉諭辦理並詳查此次因何復起釁端務令兩造輸服彼此相安儻小喇嘛抗不遵斷仍將諾們罕拘禁或致有戕傷等情卽著穆騰額查照道光二十七年琦善辦法飭令乍了連界各屬豫備土兵示以軍威鎮靜彈壓消其桀驁之氣俾道路不至梗阻總期妥愼辦理以綏邊圉將此諭令知之○庚午山東巡撫李德奏八月分雨水糧價情形得旨山東省糧價甚昂被災處所除賑恤外及明年春夏之間有應行接濟之處著查明酌量緩急具奏汝摺內稱堪以仰慰宸懷實屬套語斷斷不可置民瘼於不問也又奏歷城等十九州縣麥收歉薄本年應徵漕麥請援案暫行改徵粟米從之○乙亥肅親王敬敏薨賞銀三千兩治喪予祭葬諡曰愼○丙子命貴州提督善祿赴湖南軍營○丁丑諭內閣前因

李德奏請豫籌剝運曾經降旨令倉場侍郎直隸總督卽飭將楊村剝船調集一千五百隻迅赴臨清牐挨次剝運毋致稽延該侍郎等接奉諭旨卽當飭令該道迅催剝船前往迎剝卽剝船不敷亦當酌撥數百隻迅速轉運本日慶祺朱嶠奏接據天津道張起鵠稟稱計剝船趕到臨清河水恐已凝凍且口糧需費甚鉅道庫無款可墊又恐有誤來春供撥請將浙省各幫於臨清德州等倉暫行截卸俟來年再爲轉運等語似此推諉空言止憑該道一稟率行人奏全未籌畫倉儲急需及鄰省辦理難易情形概置不問豈竟諉之山東但以一奏了事耶本年南糧遲滯固由河道阻礙而浙江幫船開兌遲延亦從來所未有如果漕運總督並沿途各督撫同心協力及早設法催趲何至如此貽誤乃江南漕船以勉強催至山東境爲卸責迨至山東需用直隸剝船又不趕緊籌撥

觀該道張起鵠所稟名爲實在情形實則推諉不辦且旣知撥運周章豈不思截卸有無窒礙邪見在浙江嘉杭等幫米石如能撥船趕運當仍遵前旨酌撥楊村船隻趁此天氣晴和迅往撥運設或沿途必須截卸臨清德州等倉是否足資容納著倉場侍郎直隸總督漕運總督山東巡撫各將見在應辦急務迅速妥爲辦理毋得任聽屬員推諉惡習各分畛域再致貽誤懍之○諭軍機大臣等戶部奏請飭各省豫籌軍餉一摺見在楚粵軍務未能剋期竣事應用軍餉浩繁各省疆吏自應迅速籌畫以資接濟除湖南湖北廣東廣西江西甘肅雲南貴州等省或用兵防堵或地近邊陲均毋庸議外其餘各省著該督撫鹽政等督飭藩運各司確查各該省可減可刪之款及畱支待用正雜等項約計至本年下忙爲止可以移緩就急者每省或二三十萬兩或一二十萬兩各自

體察情形從寬籌備迅速覈明數目開具清單於一月內奏到候朕飭部分撥該督撫等身受重恩目擊國用支絀諒必極力圖維不至以無款可籌一奏塞責也將此各諭令知之○是月蠲緩直隸保定四十二州縣被水被風被雹卹莊額賦並給口糧有差

冬十月戊寅朔享太廟○己卯諭內閣養心殿東佛堂圓明園

殿均應供奉皇考宣宗成皇帝皇妣孝全成皇后神牌所有

涓吉恭製並一切應行事宜著該衙門敬謹豫備○賽尙阿鮑起

豹羅繞典張亮基駱秉章奏自臣賽尙阿到省後城外賊巢防備

加緊河西分踞之賊亦因向榮帶兵渡河往剿又從河東渡賊添

紮賊營數處自見家河至嶽麓山腳賊營中間踞地將十餘里十

三日向榮親督各兵由排頭口與朱啟仁潮勇南北兩路進攻將

山邊賊踞村莊燒燬斃賊約三百餘人朱啟仁潮勇亦計誘該逆

出敵約千餘人潮勇等與礮船水陸並進見家河賊營扛出大礮
沿岸拒敵委員張宏邦帶勇登岸奪獲賊銅礮一口約重四五百
斤賊又由北岸沿河西走欲從上游過河包襲參將秦如虎等急
率廣西兵由南岸沿河飛往迎擊兵勇見水過河乘勢衝殺斃賊
多名燒燬北岸田中賊營一所十五日礮船至見家河口賊營復
出數百斤大礮並用大船載礮對擊被我礮船擊破二隻十六七
日向榮將四川廣西兵一律移近趕築營壘並令潮勇仍由朱張
渡過河攻擊潮勇至龍回潭有賊數百踞守潮勇槍斃數十名餘
俱奔回下游河岸賊營十八日向榮分派各路指攻漁網市唐家
洲黑石頭賊營賊伏牆內開放槍礮牆外竹籬徧地竟難攻入馬
龍督兵將賊踞屋焚燒副將明安泰帶川屯兵由左家壠繞來潮
勇亦過河進至見家河北岸夾攻鏖戰六時之久殺賊過百此河

西岸數日攻剿之實在情形也和春秦定三兵十三四日分路攻奪妙高峯西湖橋等處賊營將賊牆外望樓哨棚燒燬常祿兵移營進逼金盆嶺與賊僅一田隴之隔十四日直攻賊營一面出隊至大河邊新開鋪築營分兵往紮正攻賊營之際忽賊一股從河邊翻山前來接應被新開鋪築營兵勇擊退十五日李瑞經文岱王錦繡等亦於五鼓直抵黃土嶺賊營槍礮齊施將賊牆草棚延燒賊旋撲滅仍於牆孔密施槍礮我兵撲攻數次疊有傷亡此省城外官軍攻剿之實在情形也臣寶尙阿張亮基等密飭鄧紹良兵由魁星閣城下地洞出至南門外攻打碧湘街賊巢賊匿牆孔內施放槍礮我軍由後牆拋擲火罐焚燒該匪見火勢緊急蠶擁出巢迎敵我兵奮力攻擊槍斃賊匪多名臣等偵察賊情又研獲賊供見在賊中粵匪死黨不過數千各屬脅從之徒則不止萬眾

見飭各文武凡有緝獲逸出賊犯果係脅從者務卽省釋期於解

散或收實效竊計省垣重地逆匪攻擾已經五旬

臣

等見飭將弁

等嚴加偵守

臣

徐廣縉到楚尙無確信提督福興所帶兵勇聞抵

道州

臣

賽尙阿當卽飛催迅由衡州湘潭取道河之西岸前來與

向榮之軍合力會剿又奏河面牛頭洲等處有賊盤踞向榮親督

官兵從牛頭洲上之江神廟一帶涉淺渡河該匪先從樹林出賊

數百拒敵總兵馬龍親率兵勇開放槍礮斃賊多名該匪不能抵

敵卽時敗回復從林內擁出賊千餘人經總兵王家琳督兵橫衝

而出賊仍望林內奔回我軍連燒賊踞村房數處

上諭軍機大

臣等逆匪攻擾長沙已經五旬之久日夜槍礮與城上相對轟擊

並開挖地道用木板杉條擋挂欲用火燒陷城兇狡已極我兵雖

連日攻剿獲勝總未直搗賊巢大加懲創其河西分股之賊經向

榮督飭兵勇分路剿襲雖有傷亡我軍尙屬奮勉和春等攻擊城南賊匪不過敷衍塞責未見勇往出力徐廣縉此時諒已帶兵馳抵長沙省城接受欽差大臣關防及湖廣總督印信所有軍營及地方文武統歸節制責無旁貸見在省城內外大兵雲集兵力不爲不厚該大臣務當申明紀律督飭在事文武趁此賊匪屯聚一處併力圍攻以期一鼓殲除爲擣穴擒渠之計萬不可任令竄逸更滋蔓延至河西分股賊匪尤須趕緊剿滅福興所帶之兵諒亦趕到著卽飭令合力會剿毋稍延緩如將弁有臨陣畏葸退避仍蹈從前惡習者該大臣卽一面奏聞一面於軍前正法以肅軍律逆首洪秀泉楊秀青等是否均在妙高峯一帶賊巢務須設法殲擒應如何解散脅從以孤賊勢諒該大臣必能統籌全局以副委任也將此由六百里諭令知之○予湖南陣亡參將蕭逢春等祭

葬世職○辛巳 上臨故協辦大學士杜受田第賜奠○賞已革
陝甘總督琦善六品頂帶○壬午賜田在田等五十四人武進士
及第出身有差○諭內閣昨日朕親臨杜受田宅奠醑撫棺灑淚
悲悼實深並見其門庭卑隘依然寒素家風追念遺徽益增感愴
當召見伊父前任禮部侍郎杜堦令其兩孫杜翰杜翻扶掖起跪
精神尚可支持惟年屆九旬遭茲慘痛何以爲情杜堦前已賞給
頭品頂帶著再加恩賞給禮部尚書銜其勉自排遣加意頤養以
慰朕念將來杜受田靈柩啟程回籍時著派恭親王奕訢前往祖
奠目送並著沿途地方官妥爲照料護送到籍用示朕篤念舊學
有加無已至意○諭軍機大臣等陸應穀覆奏平安峪定穴係印
證古書斟酌形氣一摺覽奏均悉惟所稱知其有石故請淺爲開
鑿恐其有水故請用土培築等語是否能臻鞏固若不慎重於先

恐開工時多所掣肘因思成子峪一處上年載銓等相度以爲可用迨陸應穀覆看亦以爲合法惟所定皆戍山辰向前據馬蘭鎮總兵慶錫呈遞道光年間奏案當時曾經欽派大臣相度成子峪擬定辛山乙向並稱查看四面土色皆係紅黃並無大石等語又據彭蘊章面奏陸應穀於成子峪雖擬戍山辰向亦曾言辛山乙向均屬可用儻成子峪定作辛山乙向其前準對何山一切形勢理氣較平安峪如何著陸應穀細心考覈據實指陳以備採擇將此諭令知之○癸未諭內閣僧格林沁奏骸疾時發步履維艱一切差使恐有不敬請開御前大臣領侍衛內大臣之缺等語僧格林沁毋庸開缺嗣後凡遇隨從行禮差使著加恩毋庸隨從以示體恤○諭李德奏籌款剝運南漕等語見在山東省剝運南漕所需剝費准其在司庫存儲雜款內暫行借動銀一萬五千兩事竣

照案歸款並著撙節動用覈實辦理其剝運事宜著仍遵前旨與直隸總督倉場侍郎一體嚴飭所屬迅速趕辦總期不分畛域接剝抵通毋稍遲誤○山東巡撫李德奏遵查各屬村莊尚有續淹處所得旨所奏尙無粉飾殊屬可嘉又奏豐工未合濟甯等處被淹戶口將截畱南漕三十萬石分四箇月賑濟報聞○甲申諭內閣黃宗漢奏籌議新漕懇請試行海運一摺本年浙江漕船開兌過遲最後各幫延至九月下旬甫經輓運出境即使截剝回空斷難如期歸次受兌所有來歲新漕亟應變通辦理以免貽誤著照該撫所請改由海運以期迅速並准將原辦河運各費併歸海運支銷一切章程卽由該撫督飭司道慎重籌議妥速奏辦○諭黃宗漢奏參貽誤漕運之前任糧道一摺前任浙江糧道胡元博於回空糧船迎提已遲迨新糧監兌之後並不迅速催趲復屢次回

省節節耽延以致在後各幫至霜降後尙未具報開行並訪聞未
開各幫尙有銀米短絀情事實屬玩誤胡元博著卽革職由漕運
總督委員押令回浙將未報開行之在後四幫銀米勒限清釐儻
查有別項情弊著卽嚴參○乙酉諭內閣博勒恭武奏剿辦土匪
請將出力之弁兵鼓勵一摺湖南臨湘縣土匪聚眾滋事經提督
博勒恭武鹽法道王東槐調派員弁帶領兵勇前往桃林會拏當
將賊巢焚毀拏獲逆匪楊勝兆等卽行正法此股土匪雖殲斃多
名尙未擒獲首犯惟念該員弁等盤查奸細搜出糾會逆帖拏辦
尙有微勞著徐廣縉常大瀄悉心查覈會同博勒恭武酌保數員
毋許冒濫其未獲首犯王萬里等仍著該提督等嚴飭緝拏毋任
遠颺○諭軍機大臣等張芾密陳江西界連楚粵地方辦理防堵
及團練鄉勇均不能不借資民力又兵差過境尤不免有擾累請

特降諭旨詳細查明情形分別蠲免等語該署撫所奏自係體察地方情形爲弭患未然起見朕原不難明降諭旨立沛德音惟楚粵毗連地方甚多雲南貴州湖北等省均辦防堵且有至一二年之久者至兵差過境地方尤難計數若止降旨加恩江西一省則他省不免向隅若各省概行查辦諭旨一到人人冀望恩澤不特借資民力勢恐有所藉口卽請蠲請緩地方官分別輕重情形亦難家諭戶曉且恐無知愚民以恩旨爲名紛紛呈請封疆大吏不能不覈實酌辦稍加裁抑卽難保不以恩爲怨甚至聚眾違抗別滋事端是弭變而適以滋變朕再四籌思諸多窒礙民可使由不可使知凡事慎之於始庶免流弊所有江西界連楚粵辦理防堵團練等處地方仍著該署撫詳細查明如有實在苦累之區卽由該署撫分別輕重酌量奏請恩施正不必奉到諭旨始行查辦也

另片奏設立軍需總局一節向來用兵地方例准設立軍需專局如糧臺在廣西追賊匪由粵竄楚又復移至湖南原係兵行糧隨之義江西界連楚省派兵堵禦支用款目自應派員專司其事以慎出納惟與湖南軍營情形不同若設立軍需專局轉易啟委員等鋪張侵冒之弊著卽責成藩臬兩司經理其事查照則例派委委員詳細勾稽撙節辦理毋庸設立軍需總局名目該署撫卣膺疆寄所有外省地方情形尚未深悉經此次密諭之後諒必能仰體朕意酌量輕重於一切應辦事宜悉臻妥善也將此諭令知之○諭有人奏請籌安徽防堵事宜據稱皖省設防不在省城而在安慶府屬之宿松縣此地與湖北黃梅江西彭澤各縣交界大江中流有小孤山爲門戶於此善爲防堵賊自無從飛越至於陸路獨太湖縣界連湖北餘如望江婺源祁門建德東流皆界江西率

有崇山峻嶺可守惟當令府縣各官勸諭紳民互相保衛並立法以拏土匪懸賞以緝游匪無庸官辦防堵招集無賴徒滋擾害等語著蔣文慶按照所陳各節詳細體察不動聲色妥爲籌辦其應行嚴防之處仍遵前旨慎密守禦不可徒事張皇轉滋流弊將此諭令知之○以福濟爲奉天府尹調英桂爲山東按察使以麟桂爲山西按察使

由浙江鹽運使遷

○戊子諭內閣訥爾經額奏籌辦迎

剝南漕並動用解歸原借海稅銀款發給放空口糧一摺本年南漕入東過遲前經降旨飭撥楊村船隻迅往剝運茲據奏稱遵調楊村官剝一千隻赴臨清州供剝另調官剝一百隻赴安陵一帶迎剝所需放空口糧著准其在海稅解部項下動撥銀八千二百五十兩以濟要需事竣照例扣還歸款至所稱剝船在途守凍議給口糧臨時體察一節仍著該督嚴飭領剝各員星速迎剝即使

河水稍凍亦須設法打冰剝運總期多到一船卽多收一船之米
儻因節候過遲竟不能全數抵通天津北倉尙可截卸斷不可以
守凍爲名遲延觀望徒致虛糜剝費仍無益於倉儲也○己丑署
湖廣總督徐廣縉奏臣在桂林奏報起程後卽將所帶兵勇水陸
並進見於十月初一日行抵衡州據各路探報長沙城外河西之
賊多於河東兩岸俱有賊營並於江面搭造浮橋見家河口已築
礮臺向榮之營見紮河西臣已飛飭福興督帶兵勇馳往會剿前
後夾攻又江面之賊利用船礮火攻臣隨營員弁楊雄超等熟諳
船礮卽令在衡州趕緊置備隨同高唐道沈棣輝高州鎮玉山先
行分帶前進臣俟布置齊備亦卽馳往湘潭就近督辦總期將此
股剿滅聲威旣振方可挽積疲之勢見在長沙分路圍剿之兵似
難撤動臣已飛飭福建兵三千名由萍鄉一帶堵截其各省續調

之兵請旨飭令行抵岳州各等處分駐防堵毋庸再赴長沙庶或防或剿得專責成 上諭內閣徐廣縉奏十月初一日馳抵湖南衡州飭令福興督帶兵勇馳往長沙城外會同向榮攻剿河西一帶賊匪並派隨營熟諳礮船之員弁楊雄超等隨同高廉道沈棣輝高州鎮玉山分隊前進徐廣縉亦即馳往湘潭就近督辦所有福建兵三千名業據飭令由萍鄉一帶堵截其各省續調之兵著卽分紮岳州防堵該大臣務當嚴申紀律督率鎮將等同心協力直搗城南賊巢毋令紛竄如有遷延觀望畏葸不前甚至賊至卽潰賊去不追貽誤事機者卽將帶兵之員用朕賜遏必隆刀軍法從事以振積玩而肅戎行○諭軍機大臣等徐廣縉奏長沙城外河西之賊多於河東並於江面搭造浮橋見家河口築有礮臺意在牽掣我兵且爲他竄之計該大臣務將河西股匪先行剿滅並

將長沙城南賊巢併力圍攻毋令逆首乘閒竄逸本日據蘇布通
阿奏遵旨由四川馳赴湖南軍營著俟該提督到後卽撥給四川
兵三四千名令其督帶俾兵將相習可收指臂之效其所帶員弁
兵丁十二名並會鹽營游擊姚鵬程馬邊營守備張正倫千總陳
澤王夢熊及得力弁兵五十員名著卽歸該提督統帶並由該大
臣察看酌量差遣可也將此由五百里諭令知之○壬辰以冊立
皇后前期遣官告祭 天 地 太廟 社稷 上詣 奉先
殿行告祭禮○諭內閣李芝昌王懿德奏參延不進剿之水師提
督一摺福建水師提督鄭高祥督剿艇匪甫經出洋卽藉稱風大
按兵不動繼復以修理船隻折回廈港置剿匪於不問實屬畏葸
不前鄭高祥著先行交部議處仍令戴罪統帶師船出洋剿捕務
將各艇匪悉數殲除儻再藉詞延宕卽行嚴參○廣西巡撫勞崇

光奏遵查粵西軍營支發章程惟優給壯勇雇值及加增武弁鹽糧長夫均與例案不符係因軍務緊急量爲變通將來歸入外銷辦理尙非任意糜費得旨汝摺內聲明外銷之款若無此旨則未免含混速定章程從實覈辦又奏剿捕鬱林州屬土匪肅清報聞○欽差大臣署湖廣總督徐廣縉奏報接受欽差大臣關防並陳在事鎮將半月以來按兵不動積玩已久得旨鎮將各員玩泄固久然其中不無可用之人第觀駕馭何如耳朕知汝辦事才尙可觀然望汝擴充度量不可褊狹懷之○季芝昌以病免調吳文鎔爲閩浙總督以羅繞典爲雲貴總督崇綸爲湖北巡撫由廣西布政使遷○調鄭敦謹爲廣東布政使由署河南布政使調○命阿勒楚哈副都統薩炳阿往湖南軍營○癸巳羅繞典張亮基駱秉章鮑起豹奏省城東面一帶路通湘潭等處最爲喫緊我兵於各營盤空處趕挖長

濠一面密致向榮等扼截河西賊匪去路九月二十五日總兵和春分飭各營出隊齊抵賊巢該匪於妙高峯外遙開槍礮抵拒經我兵擊斃數十人二十六日朱啟仁張國樑等復會攻浮橋河面有賊駕礮船十餘隻兩岸接應之賊約二千餘人朱啟仁督勇開放槍礮賊匪紛紛落水二十九日賊於南城西邊暗放地雷城身墊陷四丈有餘該匪約二三千人蠶擁向前副將鄧紹良大呼躍出缺口手刃數賊右膊被礮子穿過尙屹立不退賊目麾眾直上千總趙繼宗頭受槍傷登時陣亡弁兵奮勇向前立將賊目斬首奪獲太平先鋒字樣大黃旗一面乘勢壓下殺斃長髮賊百數十名短髮賊三百餘名餘賊敗退立將缺口補砌此二十九日賊撲城垣弁兵奮勇獲勝之實在情形也其河西一帶向榮馬龍於三十日五鼓出隊副將明安泰督兵勇開放槍礮立斃多賊參將虎

嵩林等從上游接應一面攻拆浮橋賊亦掉船十餘隻近橋救護
我兵躍上浮橋截斃數賊奪獲賊船二隻賊紛紛斃水逃竄十月
初二日我軍正在南月城外加挖濠溝忽該處地雷轟發離城根
丈許土石並裂賊突出二三千人蠶擁直前和春揮弁兵迅由本
營橫衝而出攜親兵二人上城躬臨垛口指揮殺賊忽賊中一礮
飛來親兵二人應聲倒斃和春亦被垛輒碎沙撲傷頭面並傷右
手倉卒間知府江忠源所部軍功徐以祥首先帶勇由城西缺口
兩旁搶下直奔賊隊同時鎮守弁兵亦搶下會合和春所帶兵勇
三路合力衝殺鏖戰逾時斃賊三百餘名此初二日賊猛撲省城
兵勇奮勉獲勝之實在情形也見在仍將城外濠溝趕緊加挖以
防地道臣鮑起豹晝夜駐城防守和春等固守東南北三面各要
隘向榮等屯紮河西不敢稍有疏虞行間文武官紳奮勉出力擇

尤開列懇恩獎勵 上諭內閣此次賊匪暗用地雷連撲省城經
羅繞典張亮基駱秉章鮑起豹等督飭官兵殺斃多名疊獲勝仗
剿辦尙屬認真所有戰守出力各員自應量予恩施總兵和春著
交部議敘知縣王葆生著賞戴花翎以同知升用陳丕業著交部
從優議敘縣丞楊恩綬著免補本班以知縣補用照磨蕭勝遠著
以縣丞遇缺卽選並賞帶六品翎頂副將鄧紹良著賞加總兵銜
都司金玉貴著以遊擊儘先補用周兆熊著賞戴花翎千總蕭知
音著免補守備以都司儘先補用守備蘇元林著以都司卽用萬
年新侯光裕均著賞戴花翎把總龍正躍著以千總儘先補用徐
嶸姚大興外委尹開泰均著賞戴藍翎楚勇頭目徐以祥著以把
總儘先補用陣亡之千總趙繼宗著交部照例議卹○甲午命大
學士裕誠爲正使禮部尙書奕湘爲副使持節齎冊寶冊立 貴

妃鈕祜祿氏爲 皇后○李德奏查東省爲南北通衢臣到任以

來首嚴捕務前因沂州府屬之蘭山縣有幅匪張雪等聚眾搶劫

拒殺把總趙大興身死一案幅首閻三虎等未經弋獲當將蘭山

縣知縣張應翔奏參勒緝本年沂屬秋收稍歉且該處地近豐工

匪徒易於勾結尤宜加意嚴防臣督同臬司福濟隨時察訪因聞

沂屬之郯城縣紅花埠一帶與江南邳宿等州縣接壤之處時有

幅匪蟻聚乘隙劫掠行旅該匪等恃在兩省交界此擎彼竄猝難

搜捕非兩省文武各員實力協剿恐致釀成巨案當經一面飛咨

兩江總督臣飭屬堵擊一面密咨兗州鎮臣百勝遴派幹練武弁

並嚴檄沂州及接壤之兗州等府督飭各屬會同各該營員確探

巢穴蹤迹四路截捕茲據署郯城縣知縣李啟昌等稟報探得該

匪出沒多在江境一由海州竄入宿遷縣之劉馬莊一在邳宿之

審灣等處恐兩幅合而爲一闌入東境滋擾請添兵協剿等情臣
已密咨兗州鎮添調該處附近弁兵三百名並由省遴委沂州營
都司郝正庠等馳赴兩省交界之紅花埠一帶會同地方文武扼
要堵截務須不分畛域痛加剿捕使羣匪竄逸無路庶可悉數殲
除報聞○乙未 上以冊立 皇后詣 皇貴太妃前行慶賀禮
○御乾清宮受 皇后禮御太和殿王以下百官行慶賀禮恩賜
有差○丁酉諭內閣葉名琛奏馳抵韶州分兵截剿賊匪疊獲勝
仗並各路圍拏多賊一摺廣東韶州一帶匪徒因楚匪先有糾約
之信彼此勾串希圖劫掠經葉名琛督飭文武於東西兩路嚴密
堵截疊獲勝仗大挫兇鋒辦理頗爲迅速惟山內尚有餘匪往來
嘯聚亟應趁此聲威痛加剿洗毋畱餘孽並於楚粵交界各路加
意設防如有應須協剿之處該署督卽飭令將弁越境合力殲擒

以綏邊圉○己亥諭內閣禮部奏據朝鮮國王咨稱近年以來內地船隻前往該處沿海各島捕魚每次漁船或八九十隻或數百隻船載多人並有鳥銃器械等件其船號俱是登州萊州甯海榮城奉天江南蘇州各等處船隻未便擅行驅逐等語沿海居民越境漁採例禁綦嚴康熙五十一年曾奉諭旨朝鮮海洋漁採船曾經申飭嚴緝今尙有船至朝鮮邊界捕漁是卽海寇嗣後許該國卽行追剿如有生擒者卽速解送等因欽此聖諭煌煌中外均應恪守乃近來復有內地船隻前往該處漁採實屬有違定例著盛京將軍奉天府尹並沿海各督撫飭屬一體嚴禁認真編查如有前項船隻越境漁採卽行照例懲辦將該管官查參議處並著該部行知該國王遵照康熙年間諭旨嚴查辦理以肅邊防而申禁令○庚子 上奉 皇貴太妃幸恭親王奕訢第○諭

內閣季芝昌王懿德奏遵旨查取前任刑部郎見調補福建道員文秀親供據實覆奏一摺文秀前在刑部郎中任內尙無饋送堂官書元銀兩情事惟於書元告知當差勤慎召見時面保之語輒向同官談及亦有不合著交部議處○諭慶祺朱嶠奏河水凍合亟籌截卸事宜一摺本年南漕行走遲滯見在北運河業已凍合所有在後之江安重運剝船勢難徑抵通壩著准其照道光三十年辦過成案暫行截卸天津北倉候明春冰泮卽行運通並著派朱嶠帶同坐糧廳監督一員迅往天津驗收一切經費均查照上屆成案辦理其浙省杭嚴三等七幫已入東境見派剝船接運著山東巡撫直隸總督嚴飭迅速迎剝催趲設法打冰前進務期剋日輓抵津關一併截卸北倉毋任藉詞延宕其尙未報入東境之嘉白等幫是否尙可趲行抑須就近截卸之處著漕運總督山東

巡撫酌量情形妥速籌辦○辛丑諭內閣漕糧爲天庾正供近來重運漕船不能如期抵壩以致回空歸次兌受新漕節節耽延本年幫船北上開行已遲沿途又不實力催趲直至運河漸已凍合尙未全數抵通見將在後之江安重運剝船截卸天津北倉浙省杭嚴三等七幫由山東打冰剝運並有嘉白等幫尙未報入東境似此任意延玩實從來所未有刻下節近大雪水勢日消若不趕緊趲令歸次來年新漕受兌必致貽誤關繫匪輕除浙江各幫該撫請改海運江蘇各幫明年仍分別海運外其餘各省幫船著漕運總督嚴飭起卸各幫卽日連檣南下銜尾過行不准片刻停留並著東河南河總督及有漕各督撫分飭各地方嚴切催提及早歸次來年新漕尤當迅速辦理按期開兌統於四月初十日以前催抵清江剋期渡黃毋得因本年回空較晚又復藉口耽延儻將

節次諭旨視爲具文仍致臨時周章有逾例限定將該漕督及有漕各省督撫嚴行懲處決不寬貸懷之愼之將此通諭知之○癸卯諭內閣陸應穀覆奏平安峪成子峪兩處地形一摺所有原派相度之王大臣除載銓見告病假外著裕誠奕湘彭蘊章基溥各帶堪輿前往該二處再行公同相度其平安峪定旁地面此時可否先行開看土色抑俟來春再行開視著裕誠等悉心酌度辦理成子峪如立辛山乙向前面準對何山一併閱看詳細覆奏所有載銓陸應穀前帶堪輿各員著裕誠等一併隨帶前往○諭李德奏援率請展減引年限又片奏商捐釐頭等銀仍請暫停催徵各等語山東鹽綱減引十萬道前經奏准推展自道光二十八年至咸豐二年展限已滿茲據該撫查明商累未能復原本年場竈又被潮災若將新引遽復舊額商力實有未逮加恩著照所請所有

山東鹽課原減引十萬道准其援照成案自咸豐三年爲始照舊減運俟五年限滿再行酌復舊額其應徵商捐釐頭及不敷公費銀兩亦著准其暫停俟咸豐四年卽行催徵歸款該撫仍當督飭運司催辦課額毋稍延宕○甲辰諭內閣徐廣縉奏遵旨查明賽尙阿隨帶文武員弁兵丁飭令回京開單呈覽副都統銜頭等侍衛開隆阿係朕特命賽尙阿帶往軍營之員著仍畱湖南軍營交徐廣縉差遣委用其餘文武各員及兵丁等仍著飭令回京當差○諭軍機大臣等張芾覆奏江西防堵情形一摺據奏袁州吉安南安贛州各郡分派鎮道大員及紳士協同相度道里遠近分布防守尙屬周密至九江一郡爲吳楚咽喉先事豫防固當籌及第賊匪見在長沙經大兵攻剿若竄江西地界自以袁州吉安爲最要關鍵九江距湖南尙遠較之萍鄉等處緊接賊竄地方者有間

該署撫惟當酌量緩急妥籌辦理兵分則單設非緊要之區派撥較多恐於應行嚴防處所轉致疏忽戰船廢弛已久經費當支絀之時倉卒籌辦不但購料修造緩不濟急且徒糜餉需無濟實用其江蘇舢板船隻果否足資巡緝抑可就本地商漁船內酌度情形稟備應用該署撫務須不動聲色嚴密籌維於尋常稽查保甲之時加意偵緝遇有奸細窺伺立即擒捕嚴飭營員督兵防禦總期處以鎮靜勿使安堵居民轉因此而驚擾並當嚴飭在事文武員弁於一切經費力求撙節毋得藉詞冒濫爲將來開銷地步片奏與陳孚恩商派各員前赴各府會同該地方官勸諭紳富樂輸等語著照所議妥爲籌辦仍當嚴飭委員及地方官毋得抑勒苛派致滋弊端將此諭知張芾並諭陳孚恩知之○徐廣縉奏臣見駐湘潭查得匪距長沙城南兩月有餘尚未竄動自分踞河西

以後搭造浮橋往來接濟河西賊營實已多於河東其東面一帶業經前大學士臣賽尙阿督飭將弁挖濠分堵自長沙南門外蔡公墳起至豹子嶺止連營十餘里挖濠寬深丈餘堵其東竄臣見已函致向榮督飭各路鎮將力籌攻剿至進剿次第誠如訓示河西分股賊匪尤須趕緊剿滅確查長髮賊匪男女老幼不過四五千人其眾萬餘多係土匪如能將河西股匪剿滅則應援既絕圍剿不難至湘潭地面距省城九十里距賊營五十餘里實爲衡寶等屬扼要之地臣擬卽駐紮湘潭於西南一帶可資鎮壓且於大營呼吸相通亦可隨時調度報聞○乙巳定郡王載銓等奏酌擬寬籌軍餉章程一王公文武京外各官及致仕休致降革丁憂告病大小官員一體量力捐輸一八旗已未出仕之宗室量力捐輸應如何獎勵之處請旨定奪一翰詹科道准捐外任一京察一等

記名道府各員准捐分發一京外各官已補缺者試俸歷俸年限
准全行捐免一內閣中書准捐免試俸一各項回衙門行走之員
准報捐外任一告假告病及丁憂服滿在恩詔以前各員准仍照
原官捐請封典並准加級請封一捐封不限服制並准照例定應
封品級酌加推廣一准推廣外姻尊長捐封一休致人員准照原
銜捐封一降革不准捐復人員除實犯贓私外其餘准加倍半捐
復一舉人及恩拔歲副優貢生准報捐國子監助教學正學錄一
文武各官分別京外准各按品級報捐花翎一降革一品以下文
武官員向不在捐復之例者准捐復原官頂帶一軍臺效力官犯
准先繳臺費分別釋回免遣一發遣新疆等處官犯分別已未到
戍酌定贖罪銀數准釋回免遣一軍營官員兵勇所得領項及商
賈匯兌銀兩暫行交官充餉給與印單酌定限期給領一用廣儲

司舊存金牌以抵軍營賞需一照浙江夷務案內用賞銀執照一
京外置買房田未稅契者於文到日限三月內補稅一招商開採
熱河及新疆各城並各直省所屬金銀礦得旨覽所議各條各項
回原衙門行走之員報捐外任仍應歸吏部帶領引見候朕欽定
京外文武一二品降革人員如有願捐復原銜者亦須奏明請旨
以示限制而懲惡劣新疆等處官犯贖罪一條著暫不必行餘依
議○丙午調培成爲理藩院右侍郎廣林爲盛京工部侍郎耆瑞
爲盛京兵部侍郎和色本爲盛京禮部侍郎由理藩院右侍郎調○是月蠲
緩山西托克托城被旱邨莊本年額賦並給口糧緩征山東歷城
等四十六州縣德州四衛被災民屯並范縣被水邨莊新舊額賦
緩征廣西江西被賊各鹽埠道光三十年課餉之半蠲緩湖北公
安等二十八州縣武昌等九衛被水被旱民屯新舊額賦給鍾祥

公安漢川天門災民口糧蠲緩奉天金復等九廳州被水旗地本年額賦貸遼陽牛莊旗戶一月口糧賑四川平山等八州縣災民免江西撫州幫漕船遭風漂失米